

da biker

(wildschütz 2002)

eines sonntags frühmorgens
går zeitig in da friah
nimmt da biker sei radl
und en schutz fi de knia
er kennt jå de weg und steig
fi sei neis moutainbike
wohl im gebirg

und er fährt frisch und munter
über wiesen und flur
ållweil höher und steiler
wohl der bergwertung zua
er schnauft und schwitzt
tuat fåst scho speibm
schålt nid zruck auf d große scheibn
er is hålt a mãnn

und glei nåch da kurv
über m lårchnwåld scho
steht auf oamål a schrånkn
und a taferl hängt drån:
es radlfåhrn is nid erlaubt
weils so laut is und so staubt
und überhaupt

und da biker werd grantig
und sågt: des id nid recht
weil der wåld ghört uns ålle
wurscht ob herr oder knecht
und wås a echter biker is
hålt vor nix und neamand schiss
und fährt wo a wü

und er fährt oanfåch weiter
schneidig aufrecht und gråd
weil er is hålt no oana
der sein bikerstolz håt:
es lebe hoch die bikerei
schrankenlos und ewig frei
bis in den tod

und a kloans stücke weiter
hinter m gamskoglråbn
jå då huckt scho da fershta
auf sein suzuki obn
gach kimmt eahm via åls wa då wås
er nimmt s zeiss&jena-glås
und schaut ins gestråuch

und er siahgt glei den biker
und er håt n glei kennt
an seim neonfårb-outfit
weil des håt n fåst blendt
er holt no schnell sein hund und legt
sich auf d pirsch glei nebn an weg
gånz still und stat

und da biker kimmt zuawa
und da fershta springt auf
und des tragische schicksål
jå des nimmt hålt sein lauf
wås du tuast des derf nid sei
deshålb fährt du hiatz voll ein
weil hiatzt zoag i di å

und da fershta måcht ernst und
er frågt nåch sein nãm
und da biker sågt: fershta
auf den wårtst du lång
er draht gånz oanfåch s radl um
fährt davon mit einem schwung
und daschreckt den kloan hund

und da hund is a jågdhund
und er tuat wås er muaß
er sellt glei den biker
und er zwickt eahm in fuaß
der biker schreit: i glab i spinn
kimmt mitn radl in a rinn
und fliagt in an gråbn

und den fershta druckts gwissn
und en biker druckts knia
es neie outfit is zrissn
er is aufgschürft åls wia:
fershta liaba fershta mei
bind mir die wunden ein
und pick ma n påtsch

und fershta sågt: biker
kimm i nimm di gach mit
glei dåhintn ban hochstånd
då standat mei jeep:
bevor i mit an fershta fåhr
hupf i liaba ehrlech wåhr
auf oan fuaß ins tål
kruzefix nochamål

(c) fritz messner / roabee music